

Vschinauncha da Zuoz



Uorden da Chalandamarz

Decis da la radunanza cumünela dals ...

I. Introducziun

A Zuoz ho il Chalandamarz üna lungia tradiziun culturela e politica da grand' importanza per tuot la populaziun. Il Chalandamarz cun las tschernas cumünelas es üna festa per tuot la vschinauncha e nun es ün evenimaint be per scolaras e scolaras.

II. Disposiziuns generelas

Art. 1 Cuntgnieu da l'üsaunza

Il Chalandamarz a Zuoz consista da la Prouva cun cortegi e dal Chalandamarz cun cortegi, chaunt, bal e marena.

Art. 2 Termin e survagliaunza

¹Siand cha'l Chalandamarz crouda insembel cullas tschernas cumünelas, stu il cortegi e'l bal da Chalandamarz avair lö sainza excepziuns als 1. marz. La cumischiun da Chalandamarz e la magistraglia sun in dovair da survaglier la Prouva e'l Chalandamarz.

²Las magistras e'ls magisters da la scoula primara survaglian in rouda ils cortegis e'l bal fin mezzanot.

Art. 3 Instrucziun da chaunt

Üna magistra u ün magister da la scoula primara ed üna u ün da la scoula da la Plaiv vegnan incumbenzadas/os cun l'instrucziun da las chanzuns. Els propuonan ed instrueschan ün patrun u üna patruna scu dirigent u dirigenta.

Art. 4 Instrucziun da sot

Mincha magistra u magister fo cun sia classa ün'instrucziun da sot (p. ex. düraunt la gimnastica). Per l'ultima classa vain organisato dal cussagl da scoula Zuoz/Madulain ün cuors da sot speciel.

Art. 5 Musica da sot

Il cussagl da scoula pissera per la musica da sot, chi vain finanzieda tres la vschinauncha.

Art. 6 Responsabilitad

Responsabel per l'organisaziun da las incumbenzas da la magistraglia es la mnedra u il mneder da la scoula primara Zuoz/Madulain.

III. Participaziun ed incumbenzas

Art. 7 Oblig

¹Piglier part stöglian tuot ils iffaunts da scoula chi sun domicilios a Zuoz e Madulain (mattas e mats). Excepziuns paun gnir admissas da la mnedra u il mneder da scoula sün üna dumanda motiveda in scrit. La dumanda stu entrar almain trais dis aunz la Prouva u il Chalandamarz tar la mnedra u tal mneder da scoula.

²Las personas cun la pussaunza dals genituors haun la prüma responsabilitad per cha lur iffaunts piglian part a la Prouva e'l Chalandamarz.

³Mats e mattas portan üna blusa da paur blova, üna chapütscha cotschna, ün fazöl cotschen intuorn culöz ed üna s-chella. Las patrunas portan il costüm engiadinais.

Art. 8 Responsabiledad per l'execuziun

La responsabiledad per l'execuziun portan patruns e patrunas. La pü veglia patruna e'l pü vegl patrun staun a la testa da quists.

Art. 9 Patruns, patrunas, chavals e vachas veglias

A dessan as parteciper 3 - 6 pêra patruns e 2 pêra chavals. Il rest da l'anneda sun vachas veglias. Scha nu basta, paun els numner a scolars e scolaras da la prosim'anneda.

Art. 10 Organisaziun interna

L'organisaziun interna vain cumbinada traunter dad els. Il dirigent vain numno in passand pled culs magisters chi instrueschan il chaunt. Acclus as rechatta üna glista cronologica da las activitads.

Art. 11 Incumbenzas

Patrunas e patruns haun d'accumplir seguaintas incumbenzas:

- a) Cumpiler ün program detaglio da tuot las activitads da Chalandamarz,
- b) organiser ils cortegis da la Prouva e dal Chalandamarz,
- c) inscriber l'organisaziun da patrunas e patruns i'l Vout, schlupper geischlas e clamer our,
- d) organiser ils transports cun chavals a Madulain; la remuneraziun dals vittürins e lur tschaina vain organisada da la cumischiun da Chalandamarz,
- e) fer uorden illas selas insembel cul custodi,
- f) procurer bindels per geischlas e tschiculatta per la Prouva (patrunas),
- g) preparar caramellas (patrunas),
- h) pisserer per la tschaina cumünaivla da scolars, cussagl da scoula, ravarendas e magistraglia.

IV. Execuziun

Art. 12 Program detaglio

Las patrunas e'ls patruns elavureschan tel a maun dal cussagl da scoula. Il program vain multiplichò da l'administraziun cumünela e scumpartieu in mincha chasada da Zuoz e Madulain.

Art. 13 Schlupper las geischlas

Il schlupper la geischla es permiss a partir dals 1. favrer e que da las 07.30 h fin al sain da not. Sün piazza da scoula es il schlupper la geischla scumando düraunt las uras d'instrucziun, eir düraunt lecziuns libras da singulas classas. La fin d'eivna es il schlupper la geischla permiss la sanda da las 10.00 h fin las 12.00 h e da las 14.00 h fin las 17.00 h. In dumengia es scumando da schlupper la geischla. Natürelmaing es il schlupper la geischla permiss düraunt las occurrenzas dal Chalandamarz.

Art. 14 La Prouva

La Prouva ho lö duos dumengias aunz Chalandamarz. Il cortegi cun s-chellas maina intuorn mincha bügl da vschinauncha. Ella cumainza a las 11.00h tal mulin vegl.

Art. 15 Chalandamarz

Il cortegi düra ün di e mez, vout dir l'ultim di da favrer e la bunura dals prüms marz. Il bal ho lö il zievamezdi e la saira dals prüms marz.

Art. 16 Clamer our

¹Las patrunas e'ls patruns as radunan il pü bod a las 21.00h in chesa d'üna patruna u d'ün patrun indichand il lö al cussagl da scoula. La festa dess esser simpla e quieta (consüm d'alcohol e fümer es scumando).

²Las geischlas suos-chan gnir schluppedas tar l'inscriver aint il Vout pür a partir da las 24.00h. Scu üsito da vegl innò vegnan preferieus ils talacs per clamer our. Eir las patrunas portan ün talac.

³Clamos our vegnan tuot ils iffaunts chi vaun a scoula. Düraunt il gir da clamer our stu regner silenzi.

Art. 17 Chanter da ches'in chesa:

¹Reuniun es il prüm di a las 07:00h sün Plaz.

²Chanto vegn seguond program in chesas abitedas tuot an illa part veglia da la vschinauncha - scha la piazza permetta - aint in chesa.

³Ils quartiers nouvs vain chanto be sün singulas plazzas. Scha pussibel dess gnir chanto in tuot las chesas dals iffaunts chi piglian part al cortegi.

Art. 18 Organisaziun dal cortegi

¹Las patronas pichan porta per annunzcher il cortegi e per facilitar als iffaunts d'entrer in chesa.

²Ellas pisseran cha'l cortegi resguarda l'urari.

Art. 19 Program dal bal da Chalandamarz

- | | |
|---------------|--|
| 14.00 - 17.00 | Sot e gös per iffaunts seguond program da las patronas e'ls patruns |
| 17.30 - 18.00 | Tschaina per iffaunts (ils magisters survaglian) |
| 18.00 - 19.30 | Tschaina per il cussagl da scoula, ils ravarendas e la magistraglia (las patronas e'ls patruns propuonan il menü in accord culla magistra u cul magister da cuschiner) |
| 20.00 - 21.00 | Producziun da la scoula primara: Mincha classa fo üna pitschna producziun (chaunt u teater) |
| 21.00 - 23.00 | Sot cullas tras-chas tradiziunelas, clamedas our tres las patronas (tras-cha da patruns, genituors, magisters, pitschens, grands etc.) |
| 22.45 | Pled dal cussagl da scoula e chanzun finela suot la bachetta dal dirigent dal Chalandamarz |
| 23.00 - 24.00 | Bal per patronas, patruns e creschieus (l'ultima tras-cha vain clamed'or) |
| 24.00 - ? | Bal da la giuventüna |

V. Cumischiun da Chalandamarz

Art. 20 Cumposiziun e constituziun

¹La cumischiun da Chalandamarz as cumpuona our da seguaintas caricas e persunas:

- Cusgliedra cumünela/cusglier cumünel - decasteri scoula
- Rapreschantanza corporaziun vschinela
- Commembra/commember tschernida u tschernieu dal cussagl cumünel

²La cumischiun as constituescha s vess.

Art. 21 Obligs

¹Ils obligs da la cumischiun sun da survagliar la Prouva e'l Chalandamarz tenor quist uorden.

²Impü stu la cumischiun administrer la chascha da Chalandamarz e pisserer per ün rendaquint dal chaschier cumünel sur da las entredgias e sortidas chi concernan il Chalandamarz. Ün avauz po gnir druvo düraunt l'an a favur da las scoulas (p. ex. viedi da scoula). Il Chalandamarz dess gnir previs i'l preventiv cumünel.

Art. 22 Remuneraziun

Las commembras e'ls commembers da la cumischiun vegnan remuneredas/os seguond il reglamaint cumünel a regard spaisas.

VI. Disposiziun penela

Art. 23 Multa

Persunas cun la pussaunza dals genituors chi violeschan sapchaintamaing l'artichel 7 da quist uorden, vegnan chastiedas da la cumischiun da Chalandamarz fin 1'000.-- francs.

Art. 24 Recuors

Cunter la decisiun da la cumischiun po gnir recurrieu infra 10 dis al cussagl cumünel.

VII. Entreda in vigur

Art. 25

Quist uorden abolescha l'uorden dals 16. 11. 2005/12. 04. 2006 ed aintra in vigur cun la decisiun da la radunanza cumünela.

Per la vschinauncha da Zuoz:

.....
Andrea Gilli, president cumünel

.....
Patrick Steger, chanzlist